

## Svör við spurningum ESB á íslensku

Mennta- og menningarmálaráðherra, Katrín Jakobsdóttir, hefur ákveðið að svör við spurningum ESB um málefni er falla undir svið ráðuneytisins, skuli birt á íslensku. Einkum er um að ræða svör við spurningum um skipan menningarmála, menntamála, rannsókna og vísinda og eru þau aðgengileg á vef ráðuneytisins:

[www.menntamalaraduneyti.is/raduneyti/evropusamstarf/](http://www.menntamalaraduneyti.is/raduneyti/evropusamstarf/).

Auk þess svaraði ráðuneytið spurningum um fjölmiðlamál, höfundarétt og fleira og verða þau birt á næstu dögum á [vef ráðuneytisins](http://vef.raduneytisins).

## Dagur íslenskrar tungu 16. nóvember

Í ár verður dags íslenskrar tungu minnst í fjórtánda sinn í skólum, menningarstofnunum og víðar.

Katrín Jakobsdóttir mennta- og menningarmálaráðherra heimsækir skóla og menningarstofnanir á Akureyri á degi íslenskrar tungu 2009. Ráðherra fer að morgni 16. nóvember í leikskólann Kiðagil og þaðan í Síðuskóla, Brekkuskóla og loks Naustaskóla. Um hádegisbil heimsækir ráðherra Amtsbókasafnið og verður síðan gestur íslenskuhátiðar á vegum framhaldsskóla og Háskólans sem haldin er í Háskólanum á Akureyri. Loks verður hátiðardagskrá á vegum ráðuneytisins, öllum opin, í Ketilhúsinu kl. 16-17.

### Hátiðardagskrá í Ketilhúsinu er eftirfarandi:

- Strengjasveit Tónlistarskólans á Akureyri leikur, stjórnandi Guðmundur Óli Gunnarsson
- Upplestur, verðlaunahafi úr Stóru upplestrarkeppninni
- Ávarp mennta- og menningarmálaráðherra
- Ráðherra afhendir Verðlaun Jónasar Hallgrímssonar
- Ávarp verðlaunahafa
- Ungkvennakór Akureyrarkirkju syngur, stjórnandi Eypör Ingi Jónsson
- Mennta- og menningarmálaráðherra afhendir tvær viðurkenningar á degi íslenskrar tungu
- Upplestur, verðlaunahafi úr Stóru upplestrarkeppninni
- Dagskrárlit - Veitingar í boði mennta- og menningarmálaráðuneytis

Á vef dags íslenskrar tungu [www.menntamalaraduneyti.is/menningarmal/dit/](http://www.menntamalaraduneyti.is/menningarmal/dit/) er að finna ýmsar gagnlegar upplýsingar um fyrirkomulag og viðburði undir merkjum dagsins. Þar er meðal annars hugmyndabanki kennara,



vísad á fróðlega sérvefi um Jónas Hallgrímsson og veitt yfirlit yfir Verðlaun Jónasar Hallgrímssonar og aðrar viðurkenningar á degi íslenskrar tungu.

Stóra upplestrarkeppnin í grunnskólum landsins hefst formlega á degi íslenskrar tungu. Um upplestrarkeppnina má lesa nánar á vefnum [hafnarfjordur.is/upplestur](http://hafnarfjordur.is/upplestur).

Málræktarþing Íslenskrar málnefndar og Mjólkursamsölnunnar verður haldið laugardaginn 14. nóvember kl. 11.00-13.30 í hátiðasal Háskóla Íslands. Aðalefni þess er íslenska í skólum. Þar verður m.a. kynnt árleg ályktun Íslenskrar málnefndar um stöðu íslenskrar tungu og viðurkenningar veittar. Katrín Jakobsdóttir mennta- og menningarmálaráðherra flytur ávarp sem hún nefnir „Út í heim á íslenskum skóm“ og fulltrúar allra skólastiga halda erindi. Sjá dagskrá á vefnum [www.arnastofnun.is](http://www.arnastofnun.is).


Dagur íslenskrar tungu er opinber fánadagur.

## Niðurstöður úr rannsókninni Ungt fólk 2009 meðal nemenda í 5. til 10. bekk grunnskóla

### Íþróttaiðkun nemenda á mið- og unglingastigi

Ef hlutfall nemenda sem stunda íþróttir æfa eða keppa með íþróttafélagi fjórum sinnum í viku eða oftar er skoðað má sjá að í 5. bekk segjast 26% nemenda stunda íþróttir sem því nemur. Hlutfallið hækkar í 7. og 8. bekk og sýna niðurstöður að um 40% nemenda í þessum bekkjardeildum segjast stunda íþróttir fjórum sinnum í viku eða oftar.

Niðurstöður sýna að hlutfallið lækkar í 9. og 10. bekk. Þegar litið er til tíundu bekkinga segjast um 32% þeirra stunda íþróttir fjórum sinnum í viku eða oftar. Ef litið er á niðurstöður eftir kynferði, má sjá að stelpur stunda íþróttir hlutfallslega minna en strákar og á það við um allar bekkjardeildir. [Nánari upplýsingar má nálgast í rannsókninni](#).



Hlutfall nemenda sem stunda íþróttir með íþróttafélagi fjórum sinnum í viku eða oftar, greint eftir kynferði og bekkjardeild.

